



Պարույր Սևակ

Անվերնագիր 13

Ինձ թվում էր նա գեղեցիկ,
Ինձ թվում էր նրա նման
Ուրիշ աղջիկ գյուղում չկա:
Այս չի՞ խոսում սիրո մասին՝ ձեր կարծիքով:
Մինչև հիմա կա այն հացին,
Որի բնին մինչև հիմա
Նրա անվան փորվածքը կա:
Այս չի՞ խոսում սիրո մասին՝ ձեր կարծիքով:
Նա ինձ համար թանկ էր, անգին,
Ես առաջին անգամ հանգին
Նրա անվամբ ծանոթացա:
Այս չի՞ խոսում սիրո մասին՝ ձեր կարծիքով:
Կարծես ինքս էլ ինձնից թաքուն,
Կարմրելով թունդ ամոթից՝
Ես գողություն արի կյանքում.
Նրա նկարն անհետացավ
Մեր ջոկատի պատի թերթից...
Արժե՞ արդյոք շարունակել՝ ձեր կարծիքով...

01.XI.1952թ.

Մոսկվա